

peispak'i ta sunu

talui to mameoi ho isi eusvuta 'e yusunu, 'iyama ohola anana'va
peistothomu ta cou homo homeyaya, homo peispak'i lea yainca yusunu,
zouc'o sunu 'o ongkosi. isicu eusvuta to mameoi 'ola hia mouyoyai to sunu
ta cou, moc'o na'no sonu, zou sunu ho teesi ho i'o poepapunku, tuyu no
mav'ov'o 'etee titha. 'ola hia mooyai to sunu, la mayo tomo toaesuesu ci evi
ho skotacucunvi, tac'u skomaenvi 'o tena topco to cea, 'ola hia meoisi to
sunu, la husvuta 'otee iachia paevo'neni, la bitesi to ngei to tesi teesi,
mooyai to poepapunku tote seo'tui. 'o hia tacvoh'i to teesi, la husvuta 'o hia
meoisi to sunu. maica isicu teoepungi 'e sunu, tec'u peela titha yusunu.

la'so na'no yupa einu 'e cou ta psoseongana,
o'ala 'aunpunpu moteohcici homo nouteuyuyunu, ko'ko mo na'no
kakutia 'ola hia somayanou ta cou. ne noana'o homo peispak'i to sunu la
na'no yonto paeo'sa no meesi homo homeyaya, 'o haahocngu 'ola
yupasuski yusunu, la to'seni ho poa mae'usnu to apngu 'o sunu, aiti 'omo
atva'esi tmaierna'o ho sa'noi.

mo mainenu na a'a'ausnasi homo yusunu 'e cou, cila na'no hia
peispak'ia homo homeyaya, ohela yainca to mamameoi, lasi umnu ta
ba'eton'u 'o sunu homo tmaikukuyungu, la fihto hia tmaierna'o ho kaebu,
homo kaebu 'o ba'eton'u, tasi poa soanono 'o nsou tamo cono emoo, la

mioci aut'uca no ba'eton'u ko'ko la acuhu yusunu homo homeyaya ne
noana'o.

nano maitan'e micu na'no aezuhu 'ola hioa, homo homeyaya 'e cou
o'anala hioa na yusunu. yumia ho isicu cohivi 'e a'a'ausnasi,
tela umnu honci i'vaha poa cohivneni ta 'o'oko, ho yaeza i'vaha
hioa 'emo umnu ci ceoceona ta cou a'toana.

ta maitan'e, 'upena 'e cou ho mocmo ci yatayiskova, ihecu anana'va
titha homo yoyaso 'e 'o'oko, honci o'te pa'cohivi mouyoyai 'e 'o'oko,
uk'ana cimo meelu mouyoyai, ma micu'so sostonu ho moc'o mhino to isicu
teoepungi ci sunu maitan'e.

'ola phini ci sunu, mo kuici man'i no mav'ov'o 'o hiasi mouyoyai,
pantomo okosi pantomo meoisi, pantomo meelu tiskova ho isin'a poa
tmaikukuyungu, na'no yonhu ho isi aiti, pantomo meelu muni ho isi poa
tmaikukuyungu, ko'ko lahe na'no titha peispak'i ta 'o'oko maitan'e.

ne noana'o, ohela yaeza titha peispak'ia ta 'o'oko 'o ploko, honci
o'tena pa'cohivneni ta 'o'oko ina niala macucuma ne noana'o, anana'o
o'ana tehe cohivi ta 'o'okoto 'emo maica ci a'a'ausna, ho iton'a cohivi teto
toehungu butasva eusvuta ta 'o'okoto.

(文章大意 僅供參考) ※字數限 200 字

玩陀螺

鄒族陀螺構造簡單，由陀螺、線及短木棒構成。陀螺是由實心硬木削成圓錐形，線條由麻絲搓成，長度看陀螺大小做決定。鄒族通常玩陀螺的時間都在小米祭空閒時間，由氏族男丁輪流將陀螺置到前方的篩米盤內旋轉，以旋轉的時間長短來犒賞。傳說鄒族米神喜歡陀螺旋轉的樣子，轉動時間越長，小米神越高興，就會賜給氏族更多福氣，所以各氏族在小米祭期間都會置陀螺，由於環境的改變，現在部落舉行小米祭時，沒有家族再玩置陀螺遊戲。